

2 Kin

Waeuwa uawa

Buka 2 Kin ipa Israel apanawa umanau waeuwaleide. 1 Kin ita 2 Kin ipa warere Dawid wandie boleno aupawe dewa ambi segalena umanawa wade. Ita buka 1 Kin bedewe Dawid boleno aupe Solomon warerelena umanawa di-anede.

Ita Solomon boleno aupawe, Israel apanawa empuempuntone bola nata seganton. Ita bola Iuda ipa Owa Bobopa tampe ita Israel ipa Galili owa tampe.

Tane walama sawo Iuda apanawa warereu ita Israelwa warereu Iawe God aiawa ruawan-toia walamawe wanwan euda obasa winedie. Tane walama isiwa warere God adiananasiae mo antoie god da wadaposimoia bedewe kadi isiu segantoie. Walama sawo apata Israel bedewe waimoie God sumanaiwa eio baiwa, me peroweta waubamon. Me peroweta debama wanaubena buka 2 Kin bedewe ipa peroweta Elaisa. Me dewa dewamona ipa ewaewa apata da God os sauwa mampe dewasapia rua. Me apata diamona ipa mo leuntopue sumanaibu God os bedewe itupue wadaposisapu.

Tane Elaisa boleno aupawe, warere uaraia dewau kadiidalen. Sa baiwa mo emalawoa apanawa God waubamono wimone me apanawa Israelwa taumone otamone anton. Tane dewa ema Israelwa mampo bauta segalen, ita ema aupe Iuda apanawa mampo segalen. God mai

menasapona me apanawa leuntopue bolawo antopu, mo sape waimoio ena 70 dialen.

Gagalo uwau sonabamoia

Gonaa nata winei, Israel ita Iuda

Peroweta Elaisa dudunawa (2.1-18; 4.8-11,
14-17, 42-44; 5.1-3, 9-19)

Tawo Asaria warereu Samaria tawowa
apanawa otamone taumone ita Israel
gonaawa nanausane diasaiena (17.5-10,
24-29)

Iuda warereu dudunau

Warere Esekia apana oniamodia mukawa
bedewe dewa ema ualen ita alene warere
Iosia mampe wisen (18.1-8; 21.1-6, 10-16,
18-24; 22.1-2, 11-13, 16-20; 23.1-4)

2

Iawe God Elaia wadene uboo odene aleide

¹ Walama kerauda os bedewe Iawe God Elaia
wadepiposidepio wiriwiritoto asiasi odepie uboo
alepi, Elaia ita Elaisa bola debama Gilgalwae
nomone antoie.

² Elaia me diene wanase, “E mape wanempa,
Iawe God dianena ne bola debama Betel bedewe
anteapa.”

Tane Elaisa sipoasane wanase, “Ulaipa Iawe
God wanwankasalala ebowe ita do e eboawo ne
sauantedina e mai eepa, dia.” Sa baiwa mo iane
Betelwa anton.

³ Ita Betel bedewe peroweta sape waimoie ita
mo wimone Elaisa diane waienase, “E ateiten ba,
dia, ande Iawe God e debamaa manawo wadepie
alepia baiwaleide?”

Elaisa siipoamone wanase, “Oa, ne atenten tane e mai gagalowa wana.”

⁴ Tane Elaia me mampe wanase, “Elaisa, e mape wanempa. Iawe God ne dianena bola debama Ieriko bedewe anteapa.”

Tane Elaisa siipoasane wanase, “Ulaipa Iawe God wanwankasalala ebowe ita do e eboawo ne sauantedina e mai eepa, dia.” Sa baiwa mo iane bola Ierikowa anton.

⁵ Peroweta Ieriko bedewe wanwanlala wimone Elaisa waitarasane waienase, “E ateiten ba, dia, ande Iawe God e debamaa manawo wadepie alepia baiwaleide?”

Elaisa siipoamone wanase, “Oa, ne atenten tane e mai gagalowa wana.”

⁶ Ita Elaia me mampe wanase, “Elaisa, e mape wanempa. Iawe God ne dianena esa Ioadanwa iape anteapa.”

Tane Elaisa siipoasane wanase, “Ulaipa Iawe God wanwankasalala ebowe ita do e eboawo ne sauantedina e mai eepa, dia.” Ita mo nata awodea antoiena.

⁷ Ita peroweta uduudu bedeuwo 50 mo do antoiena. Elaia ita Elaisa Ioadan esawa tampe nomone eneiena, ita peroweta sa uduudu 50 nomone esenama enane emontoie.

⁸ Ita Elaia garawa onapea wadenaubene nukulene mampe esa open. Ita esa meba rialene on ita sen deneuve antono me Elaisa nata nomone dogo makowa asiisi nawane anton.

⁹ Mo antone waiwa dauwo wimone Elaia Elaisa diene wanase, “Dima e baia dewasapa meneedua dianeita aupe Iawe God ne wadaposinepiodapse anteapa.”

Ita Elaisa sipoasane wanase, “Ne menanede e mukaa osowesae* debamasae neawo e aupaa wadape peroweta uwau apanawa segantapa.”

¹⁰ Tane Elaia leusane wanase, “E dewa debama iririwaiten. Ne ewaneano Iawe God wadaposine-pio odape antepino, tauma e dima iririwa waana wadaa. Naita dia, sa ide, dia.”

¹¹ Ita mo gagalontoie antoio tauwadea oas turaka teineia osowe ia idie bumedia do seganton. Ita oas sa Elaia ita Elaisa sawanauwointa nomone anton, ita Iawe God Elaia wiriwiritoto bedewainta wadenposideno uboo odene alen.

¹² Elaisa dewa ema ewene mukalene wanase, “Ne mamana! Ne mamana! Ne Israelwa turakau oas mampe teiteinala apanawa do ewamodina!” Sape me Elaia mai osowe ewapona. Me nuaparewa eueuwa dewasane garawa onapea sioleno kepawa nata seganton.

¹³ Tane Iawe God Elaia wadenposideno uboo odene aleidio garawa onapea dogo osowe noseno Elaisa waden.[†] Ita me alene esa Ioadan waiwe enen.

¹⁴ Ita me Elaia garawa onapea noseno wadena mampe esa epene mukalene wanase, “Iawe Elaia Godiwa naepe?” Me epe wane esa epeno einpue awopawa ituno nawene alen.

* ^{2:9:} Israel apanawa dewau ema epe: Mo mambu bolepio aupe me puraiwawa obampa odantopue otepu. Tane oto tau-tuwa puraiwa osowesapie otepi. Epe rua, Elaisa Elaia iririsadia me mukawa debama wanepio aupawa wadepie peroweta uau apanawa segalepi. † ^{2:13:} Eueuwa ema Elaisa Elaia aupawa wadena eueuwa. Me Elaia mukawa ita ginasawa osowelepi (ewana 1 Kin 19.19).

15 Tane peroweta Ieriko bedewe wanwanlala eseanaama enane dima segalena ewane waienase, “Elaia mukawa tauma Elaisa osowelen!” Ita mo antone me donsane danawe dogo osowe dunentoienia.

16 Mo waienase, “No apana mukamukaua uduudu 50 mape wainitana. E wawo no ane e debamaa banusata. Dauwa Iawe God Aleupa me awanene alene wadi da osowe itun, ba bola da nua bedewe itun.”

Tane Elaisa diamone wanase, “Dia, e mai aitana.”

17 Tane mo me kainokaino iririsao malalene wanase, “Sa ide aitana.” Apana sa uduudu 50 Elaisa banusapua baiwa antone laio walama natadea dialen ita me mai donsapona, dia.

18 Tane Elaisa bola Ieriko bedewe wandie, ita mo wimoieno me diamone wanase, “Ne dialena, mai aitana.”

4

Elaisa maura iwa Sunem bedewe wandia sau-sade

8 Walama dea Elaisa bola debama Sunem* bedewe alen. Sape maura iwa wandie ita me Elaisa iririidasadia me duwa bedewe wimpe nana napona. Sa baiwa walama isiwa me inta sa asiasi iedie nana nadie.

9 Me badawa diene wanase, “Asisunea, apana sa ne ateina me walama uduudu iede, me ipa God perowetawa kakaiwa.

* **4:8:** Sunem ipa bola debama Samaria eniena kilomita 40.

10 Eulena no dumba iwa[†] osowe me waimpa bolawa dewasata. Sape itu bolawa, nana watawa, wanwan bolawa ita do siwa ituta, ita me wisempe sape waimpa.”

11 Walama dea Elaisa Sunem bolawa bedewe leulene wisene ita wandia bolawe du iwe bubualepia baiwa odene alen.

14 Ema aupe Elaisa nolawa dewalala ebowa Geasi diene wanase, “Ne dima euwa i ema baiwa dewasapa?”

Tane Geasi Elaisa sipoasane wanase, “Me mai oto wadapona ita badawa ipa gulaulen.”

15 Elaisa nolawa dewalala diene wanase, “I diawo mape wimpi.” Sa baiwa Geasi alene i dieno wisene Elaisa duwa moape enen.

16 Ita Elaisa i mampe wanase, “Ena dea dialepio aupe e oto mona sitaue mabua osowe awanea.”[◊]

Tane me Elaisa diene wanase, “Debamana, e ipa God perowetawa mai laganea, ne ipa e nolaa dewalala.”

17 Tane ulaipaida, Elaisa i diena rua ena da bedewe walama sa deawaa bedewe i otopa mona gamosan.

Elaisa apava 100 nana wanamon

42 Walama da bedewe apava dea bola debama Baal Salisa bedewe wandie wisene Elaisa bured uduudu 20 wanen. Apava ena sa bedewe nanau ipawa bauta itudia uwauwantoia ebowa waia bali otene wimone bured sumoiena. Tane do nana ipawa sanaa uwauwantoia Elaisa

[†] **4:10:** Israel apanawa du wadeia iwa tabataba. [◊] **4:16:**
Bumpai 18.14

deuawa aine waneiena. Tane Elaisa nolawa dewalala diene wanase, “Nana sa peroweta auweia wanamowo ita napu.”

⁴³ Tane Elaisa nolawa dewalala wanase, “E ambi waiana, apuna 100 wadena mai nana napua rua?”

Tane Elaisa leusane wanase, “Iawe God wadia mo nana napue pokamopio moawa epu, sa baiwa nana mo wanamona.”

⁴⁴ Sa baiwa nola dewalala apuna nana wanamon. Ita mo Iawe God wana rua nana nane moawa eiena.

5

Elaisa Naeman tawo Siria warerewa sorodia debama inasan

¹ Naeman ipa tawo Siria apanawa warereu me sorodia uwauleidia apanawa debama. Iawe God Naeman sausano Siria apanawa mo mida onau eneia nanaumone aimon. Sa baiwa Siria warerewa insedia Naeman apuna debama ita wiwirawaleidie. Naeman ona debama dewasadiah apanawa ita me kero kadiwaida kito waden.

² Bautamampe Siria apanawa sorodiau anton apuna do onantopua baiwa ita Israel tawowa bedewe mo Israel iwa sanaa bodane wadeienah. Ita i sa Naeman manainapa nolawa dewalala wanalen.

³ I sa Naeman manainapa diene wanase, “Ne menanedia debamana Naeman peroweta Samaria tawowa bedewe wandia mampe alepi. Peroweta sa ne debamana kero kito wadenah inasapi.”

9 Sa baiwa Naeman oas ita turaka pue mampe teiteinala osowe waine Samaria tawowa bedewe alen ita Elaisa duwa moape enen.

10 Tane Elaisa gagalowa benemala wanaubeno Naeman mampe alen diepi wapiase, “E esa Ioadan bedewe aite walama 7 duaditaa. Ita e etea inalepio* euitaa.”

11 Tane Naeman nuawa kadilenoene aleidie wanase, “Ne insaisana badowa itunaa peroweta du bedewee nosepe mainawoido enape me Godiwa Iawe mampe rauparilepona. Ita me witapa kito osowe itupe inaneapona.

12 Ne bolana debama Damaskas esawa Abana ita Papa esau ipa eubuida tane Israel tawowa esawa mai eubu. Ne bola debama Damaskas esawa bedewe duadintape inanteapona.” Me epe insedie nuawa kadilenoene alen.

13 Naeman nolawa dewalala wimone me diane waienase, “Debamamba, e peroweta nola da debama dewasapona baiwa dieeipono dewasapona. Sa baiwa e peroweta dima dieena rua dewasaa, ‘Aite duadite euitaa.’ ”

14 Ita Naeman alene Ioadan esawa bedewe iena walama 7 God perowetawa wana rua ita etepa uduudu eulen, oto gegela etepa rua.◊

15 Ita Naeman apanawa uduudu do leuntone God perowetawa Elaisa mampe anton. Naeman Elaisa danawe enene mukalene wanase, “Tauma ne atenten Israelwa Godiu tawo uduudu osowe me os God wande! Sa baiwa ne nolaa dewalala menanedia amonana ema e wadaa.”

* **5:10:** Moses anaanawa wadiase, kero ema apana dewasadio miramiraleide (Liwai Damba Nolau 13.3). ◊ **5:14:** Luk 4.27

16 Tane Elaisa me sipoasane wanase, “Ulaipa Iawe God ipa wanwankasalala mida ne simbi-asadina, me ebewe ne wadina amona sa ne mai wadapa, dia.” Naeman aiawa badowa mampe me iririsana amona wadapona, tane me mai wadapona.

17 Tane Naeman wanase, “Ne tauma ita ando pulona Iawe God os mampe dewasapina mai god isiwa lagawau mampo. Tauma ne pue bosape Iawe God mampe pulontapa. Sa ide, pulo mai wadaa tane menaidanedia Israel dogowa saiwa pue ema nata awanepu.[†]

18 Ne ipa e nolaa dewalala rua, tane ne wareren-a alepie Saidon apanawa godiu ebowa Rimon duwa bedewe pulo watawa osowe sape wadaposilempa. Me ne mabuna osowe dodanalempo nata sape wadaposintonta. Epe dewanterpino Iawe God ide kadina insadabuamopi?”

19 Ita Elaisa Naeman diene wanase, “Wanwan euda obasa e bedeawolepio aitaa.”[‡] Ita me ene alen.

Israelwa warereu Eiab 851 B.C bedewe bolen. Me aupe Israel apanawa warereu isiwa seganton. Mo Samaria bolawa debama bedewe waimoio Osia warerelen. Tane aupe 724 B.C bedewe tawo Asaria apanawa sorodiau Israelwa onau eneiena.

[†] **5:17:** Naeman insedia Israel apanawa Godiu Israel bolawa os bedewe wadaposisai. Apa inseia Israel tawowa bola euda kakaiwa. Ita Naeman bolawe leulene wisene Iawe God mampe wata dewasan. Naeman tawowa Siria ipa Israel tawowa onape winede. Me mai menasapona apana insepuase me dogo poilen ita me peroweta iririmona dogo moa me wanapu. [‡] **5:19:** Elaisa sumanaileidia Iawe God Naeman kadiwa insepidabuasapi sa baiwa Elaisa sauwa euda wane me osowe ituno ita alen.

17

Israelwa kadiwa dewasaieno baiwa Iawe God waubamode

5-10 Iawe Israel apanawa Godiu mo Isibt warerewa mukawa atowe waimoio banlamono nomoiena me mampe kadiwa dewasaiena. Israel apanawa god da wadaposimoie ita uwa daitada apanawa dewau wawontoie. Mo ipa sa bauta Kanaan bolawa bedewe waimoio Iawe God Israelwa danauwo tanamono nomoiena. Mo Israelwa warereu dewantona rua god da wadaposimoie. Ita Israelwa weregainta dewa kadiwa daitada uaraia Iawe God mai menasaipona dewamoiena. Tane mo bolau kerakera ita debamau bedewainta, god lagawaau wadaposiu bolawa dewamoiena. Israel apanawa seu kakaila* ita Asera† kokoitauwa wadaposisampa baiwa wadi iwainta ita ia debamau bumpeinta endonton.

Ipawa ema baiwa tawo Asaria apanawa warereu sorodiawa Israel tawowa bedewe wimoienna onantopue Israelwa aimopu. Ita mo wimone bolawa debama Samaria enane bodane eneio ena natadea dianton. Tane ena 9 bedewe Osia warereleidia walamawe tawo Asaria warerewa sorodia bola debama Samaria wadane mamposaiena. Ita Israelwa diburau apanawa taumone Asaria bolau bedewe anton. Tawo Asaria warerewa mo bola debama Ala bedewe teamono waimoie ita isiwa Gosen bolawa bedewe esa Abo tampe

* **17:5-10:** Seu kakaila sa ipa Kanaan apanawa wadaposisampa seuwa. Seu ema Kanaan apanawa godiu debama ebowa Baal inainamba sabamosade. † **17:5-10:** Asera ipa Kanaan apanawa godiu iwoa. Mo ia tasila endomoie sape mo god iwoa wadaposisai.

waimoie, ita isiwa Midia tawowa apanawa bolau bedewainta teamono waimoienā.

Asaria warerewa bola da apanawa waubamono Israel bolau bedewe waimoienā

²⁴ Tane tawo Asaria warerewa bola debamau Babilon, Kata, Awa, Amat ita Sepawaim apanawa otamone Samaria tawowa debama bedewe teamon. Mo Samaria bolawa bedewainta teamono Israelwa aupau wadane waimoie.

²⁵ Bola da nambea apanawa wimoienna walamawe Iawe God mai wadaposisapona, sa baiwa Iawe God laion waubamono mo isiwa adaboiamoienā.

²⁶ Tane apana wimone Asaria warerewa diane waienase, “Apāna e waubamoano Samaria bolau debama bedewainta waimoia mo mai bola sa godiwa anaanawa atentopona ita god sa laion waubamono apana bomoi.”

²⁷ Tane Asaria warerewa wanase, “E pirisi dea wanaaubeno leulepie Samaria tawowa bedewe alepi. Mapo pirisi Samaria tawowa bedewe waimoie, tane ne mo diburana apanawa rua otamona. Ita mo bedeuwo dea Samaria tawowa bedewe waimpaa baiwa wanaaubeienā alepi. Me sape wampie apanawa sape waimoia Samaria godiu anaanawa waeuwamopi.”

²⁸ Sa baiwa mo pirisi dea mapo Samaria tawowa oso wandio wadane antoienā leulene bola debama Betel bedewe wisen. Ita me apana waeuwamodie ita mo Iawe God atentopue me wadaposisapu.

²⁹ Tane bola da nambea apanawa uduudu Israel bolawa debamau bedewe waimoia muba

godiu dewamoiena. Ita Israelwa wadaposiu bolawa osowe mo god sa teamoiena.

18

Esekia ipa Iuda apanawa warereu

¹ Ela otopa Osia ena natadea bedewe warerelen, me ipa Israelwa warereu, ita ena 3 wadedio Akas otopa Esekia warere ualene Iuda bolawa onien.

² Tane Esekia enawa 25 wadeno bola debama Ierusalem bedewe warerelen ita enawa 29 diasan. Me inawa ipa Sakaria anoopa ebowa Abia.

³ Iawe God emawee Esekia dewa eubu dodomana dewamodie me nosiwa Dawid rua.

⁴ Me god lagawaau bolawa kadimon ita seu kakaila epatuiamon tane Asera kokoitauwa iawa toiamon. Mapo Moses kokoitau mota aleupa irama mampe dewasane itun.* Israel apanawa mota sa ebowa Neustan† wane ituiena, mo mota aleupa mampe antoie piupiu suie. Mo epe dewantoio baiwa Esekia mota aleupa sa epatuiamon.

⁵ Esekia Israel apanawa Godiu Iawe bedewe sumanailen. Iuda bolawa warereu uduudu bedeuwo mai mida da me rua. Mai warere da me danawe ba adiwe me ruawa wainipona, dia.

⁶ Me walama uduudu Iawe God mampe sumanaiwa itudie ita dima Iawe God wadia

* **18:4:** Ema umanawa buka Nambas 21.9 bedewe wisiaitanewana. † **18:4:** Walama sawo Israel apanawa sala makowa bedewe wamoie mota adamodio mota aleupa ituiena eweie inantoi, tane tauma mo kadiwa dewasaie mota aleupa wadaposimoia mo godiu rua.

me ruawaleidie ita do Iawe God Moses anaana wanena me ruawalen.

⁷ Ita Iawe God ipa me do ita nolawa uduudu dewamodia ipa euda os. Me tawo Asaria warerewa adiananasane ita me nolawa mai dewasapona, dia.

⁸ Esekia Palistan apanawa uduudu ita Gasa tawowa uduudu osowe bola debama ita kerakera tane do mo bolau debama gonaalene panane, nanaumone aimon.

Ita walama sawo Esekia boleno me otopa Manase aupawa wadene warerelen.

21

Manase ipa Iuda bolawa warerewa

¹ Tane Manase enawa 12 wadeno warerelen. Me Ierusalem bedewe warerelene wandio enawa 55 diasan. Me inawa ipa Epsiba.

² Manase Iawe God aiawa mai ruawalepona. Me ipa sa bauta Kanaan bolawa bedewe waimoio Iawe God Israelwa danauwo tanamono nomoienia me bola daitada mai God atentopona dewau kadiwaida dewamodie.

³ Manase mamba Esekia laga wadaposiwa bolawa kadimon tane me sanaamon. Me pue pulontompa watawa dewamon ita mo god Baal wadaposisampa baiwa. Ita me Asera wadaposisampa iawa eindoden Israelwa warereu Eiab dewalena rua. Manase kipora uduudu uba tampe mampo uwawa epentee wadaposimon.

⁴ Mapo Iawe God wanase, “Ne wadaposina duwa Ierusalem bedewe enedia, ne ebona sape winompa.” Tane Iawe God duwa Manase

dewasano god da pueu pulontompa watawa segalen.

⁵ Tane God duwa bola empuempula* nata bedewe Manase dewasano kipora uba tampe wada posawa bolawa segalen.

⁶ Manase meba otopaida ia bedewe pulolene sun, wene dewasan ita nepoanalena, waigiolen ita me aleu kadiu mampo gagalolen.[†] Me dewa kadiwaida dewamono Iawe God awasinasa nuawa kadilen me mampe.

¹⁰ Tane Iawe God benema ema me perowetawa, mida me simbiasaia wanamon.

¹¹ Me wanase, “Kanaan apanawa dewa kadiwa dewamoiena tane warere Manase dewa kadiuida dewamon. Me Iuda apanawa dewamono mo godiu kokoitaubu wadaposimoien.

¹² Sa baiwa ne, Israelwa Godiu Iawe, poka debamaia Ierusalem ita Iuda tawowa osowe itupa. Ita mo poka sa umanawa etapue nuau saidalepi.

¹³ Ne bola debama Samaria ita warere Eiab duwa bedewe wanwanlala kadimonatuwana rua bola debama Ierusalem matangelasapa. Ne apama laukai bedewe mitedie leusaditude dia rua apama uduudu Ierusalem bedewe mitauba mopa.

¹⁴⁻¹⁵ Ne apanana Isibt tawowa ene nomoien ita tauma walamawa osowe, mo kadiwa daitada dewasane awasinaneieno nuana kadiidalen mo mampo. Sa baiwa ne apanana tauma inawaa

* ^{21:5:} Israel apanawa God duwa empuempula dea bedewe odapua rua, tane natawa da bedewe pirisi os obei. † ^{21:6:} Dewa ema dewamoie Moses anaanawa mai ruawantopona (Ditoronomi 18.14).

waimoia dabuamope emopo Iuda emalawoau apanawa mampentopu. Mo emalawoau sa Iuda apanawa dogou mamposapu ita nitubu uduudu poisamopu.”

¹⁶ Tane do Manase apala uaraia eubu epaboiamon, sa baiwa bola debama Ierusalem intawa uduudu osowe osina weuwan. Tane me osowe Iuda apanawa dewamono kadiwa dewasane kokoitau wadaposimoienna ita Iawe God adiananasaiena.

¹⁸ Ita Manase boleno apala warere duwa ebowa Usa iraiwa bedewe dobontoien. Ita me aupawa otopa Amon warerelen.

Amon ipa Iuda warerewa

¹⁹ Tane walama sawo Amon enawa ipa 22 wadeno Iuda warerewa enen. Ita me warerelene Ierusalem bedewe wandio ena nata dialen. Me inawa ipa Mesulemet Aru anoopa bolawa debama Iotba apanawa.

²⁰ Amon mamba Manase rua Iawe God aiawa mai ruawalepona.

²¹ Amon mamba dewalena rua kokoitau daitada wadaposimodie.

²² Me nosiwa Godiwa dabuasan ita Iawe anaanawa mai ruawalepona.

²³ Warere Amon nolawa apanawa debamau me bosapua gagalontone ita warere duwa bedewe bosaiena.

²⁴ Sa baiwa Iuda apanawa nola dewalala Amon bosaiena sipoa mo bomoienna. Ita me aupawa otopa Iosia itueno warerelen.

22

Iosia bola Iuda warerewalen

¹ Walama emawo Iosia enawa 8 wadeno me Iuda warerewalen ita Ierusalem bedewe wandio enawa 31 dialen. Me inawa ipa Iedida Boskat apanawa Adaia anoopa.

² Iosia dewa eubu Iawe God mampe dewamodie. Me nosiwa Dawid dewaida wadene Iawe God aiawa ita anaanawa ruawaleidie dodomana dewasadie.

Iosia apana isiwa diamona God duwa osowe sanaasapue wadapu. Tane walama sa bedewe mo God duwa sanaasae Moses anaanawa bukawa da donsaiena ita wadane antone Iosia waneiena.

¹¹ Tane warere anaana bukawa bedewe gagalo etedia nuawa pareleno ita garawa siolen.

¹² Ita warere tauwadea os pirisi Elkia, Sapan otopa Aikam, Mikaia otopa Akabo ita Sapan me ipa warere nolawa benema girumalempa apanawa ita warere waeuwa apanawa debama Asaia diamone wanase,

¹³ “No nosinosimba buka ema aiawa mai ruawantoipe ita mai dianepona dewa ema dewamonta. Sa baiwa Iawe God nuawa kadiidaleide no mainimbo. E aitane God duwa bedewe ne baina ita tawo ema apanawa tane Iuda apanawa uduudu bainimba gagaloitana. Ita do anaana bukawa ema donsaiena gagalowa bedewe wine-dia waitarawa Iawe God diana.”

Iosia nolawa apanawa debamau Iawe God perowetawa mampe anton. Tane peroweta sa ipa i, me gagalowa ema wanaubeno leulene warere mampe alen ita ema epe wan.

¹⁶⁻¹⁷ “Iawe God wadiase,

‘Iuda apanawa ne adianananeiena ita god da mampo pueu pulontoi mo kokoitau witapo dewasaie nuana kadisai. Ne poka saiwa debamaia bola Ierusalem ita apana sape waimoia osouwo itupa. Dowa uduudu buka bedewe girumalena Iuda warerewa wisialena rua. Ne nuakadina ia idia rua iepi mo osouwo ita mai mida ia sa bosapi.’

18 Aitane Iuda warerewa Iawe God waitarawa wana diane wanaase,

‘Iawe Israelwa Godiu benemawa buka bedewe etaana umanawa ema epe wade:

19 Ita walama sawo ne bola ema ita apana bedewe waimoia adiananamona gagalowa etaana. Ne apana ema dabuamopa ita apana da dewamopo mo emalawoau wakadisau baiwa mo kadiwa donsaiena umanawa wampe diamompa. E kadiwa wawiaiten ita Iawe God mampe eba ituaisitene garaa sioiten ita keida waana. Tane ne e rauparia etana.

20 Sa baiwa ne e eepo bo obasa euwa boitawo apana dobosaepu. E mai poka saiwa bola ema bedewe itupa baiwantedina ewaa, dia.’ ” Sa baiwa mo benema peroweta iwoa diamono etane leuntone warere Iosia mampe antone benemasaiena.

23

Iosia saualena Iawe God anaanawa ruawalempa

1 Warere Iosia Iuda tawowa apanawa eiau uduudu ita bola debama Ierusalem apanawa eiau diamono mampe wimoiena.

² Ita warere Iuda tawowa apanawa uduudu ita Ierusalem apanawa, pirisi ita peroweta tane do apava eboeboua ita ebousiawaia do odane God duwa bedewe anton. Ita warere Iosia God sauva badowa wana bukawa apava uduudu mampo wisialen. Buka sa nola apanawa God duwa bedewe donsaiena.

³ Tane warere God duwa bedewe tuatua tampe warere eneie gagalontoia bolawa osowe enene God sauwa badowa aiawa debama mampe wane sanaasan. Iosia badowa saualena dima uduudu Iawe God sauwa badowa buka bedewe girumamono wineia nuawa uduudu mampe ruawalempe waimpa. Ita do apava uduudu sauva sa deawa Iawe God mampe waiena.

⁴ Tane warere pirisi ionoidoa Elkia ita pirisi sausaia, do pirisi uduudu mo mida nolau du moawa oniempa badowa diamon. Mo God duwa bedewe god Baal dewamoia, Asera ita kipora uba tampe inainambu rua dewamoiena ita do nitubu uduudu otamopue nambemopu. Iosia apava diamona nitu sa otepue bola Ierusalem epue nambe Kidron tampe doba nua bedewe sumopuo imopituwapi. Ita ema aupe mo god lagawa sumoiena isanawa otamopue bolawa debama Betel* bedewe antopu.

Iosia bola Iuda ita Israel bolawa bedeuwointa alene apava godiu lagawau wadaposimoia bolawa uduudu kadimontuwan. Ita do pirisi uduudu god lagawau simbiamoia bomontuwan.

Tane warere uduudu Iosia wawe warerentoienia mo mai Iawe God wiwirawantopona, mo kadiwa

* **23:4:** Bola Betel intawa alene Ierusalemtwa wisena awa ipa 19 kilomita waden.

2 Kin 23:4

xix

2 Kin 23:4

dewasane mampe me aiawa adiananasaiena.

Ina Sanaa Gagalowa
The New Testament in the Kanasi Language of Papua
New Guinea
Nupela Testamen long tokples Kanasi long Niugini
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 18 Apr 2025 from source files
dated 31 Aug 2023

b27bd40e-e091-5268-bcbf-8232e1d7501a